



CARMEN EPITHALAMION SCRIPTVM, CLARISSIMO VIRO, ...
DOMINO SALOMONI Platnero, Iuris vtrius[que] Doctori: Qui sacra
Nuptialia celebrabat Stolbergae, cum ... virgine Gerdruida, Reuerendi
viri D. Georgij AEmilij, Sacrae Theologiae Doctoris piae memoriae, filia
dilectissima

Molhusii


Tilesius, Hieronymus


Th 8° 02720/02 (05)

https://dhb.thulb.uni-jena.de/receive/ufb_cbu_00007749

urn:nbn:de:urmel-4e52d207-1aba-43d2-b285-ab6f0d14be602-00007122-19

Lizenz: <https://creativecommons.org/licenses/by-sa/4.0/>





urn:nbn:de:urmel-4e52d207-1aba-43d2-b285-ab6f0d14be602-00007122-19



CARMEN ENIGMAMION
SCRIPTVM,

CLARISSIMO VIRO,
PIETATE VIRTUTE, ET
DOCTRINA VARIA PRÆSTAN-
TISSIMO, DOMINO SALOMONI

Platnero, Iuris vtriusq; Doctōri: Qui sacra

Nuptialia celebrabat Stolbergæ, cum

honestā ac pudicā virgine Gerdrui-

da, Reuerendi viri D. Georgij

AEmilij, Sacræ Theologiæ

Doctōris piæ memo-

riæ, filia dilectis-

sima.

A


Hieronymo Tilefio Mol-
HVSANO.



MOLHVSI

Georgius Hantzsch Excudebat, Anno

M. D. LXXIIII.



urn:nbn:de:urmel-4e52d207-1aba-43d2-b285-ab6f0d14be602-00007122-35

Carmen Nuptiale.

DOctiloquis veterum si fas est credere scriptis,
Coelicolas legimus, socialia sacra potentis
Herois Pelëi, numero celebrasse frequenti:
Lætæq; concentu quondam connubia Cadmi,
Præsentem resono decorasse Heliconis alumna:
Sic veterum Musæ testantur, sacra Tonantem
Iura probare tori focij, cum bina duorum
Corpora, concordijunguntur fœdere mentis:
Quos virtus, morum probitas, quos firma voluntas
Copulat, ac eadem valido mens fœdere neçtit:
Nam Deus vt mens est castissima, sic quoq; castos
Postulat ipse animos, casta & vult mente vocari:
Atq; animis hominum, Veneris diuina pudicæ
Semina, nascentis iam prima ab origine mundi
Inseuit, quo per castæ commercia vitæ,
Dulcia coniugij proferret pignora coniunx.
Ac velut ætherius liciti præceptor amoris,
Alternis vicibus flagrantia corda duorum
Approbat, atq; iugi communia vincla ferentes
Confouet, ac dulci aspirans complectitur vmbra:
Sic contra turpes hostiliter odit amores:
Cordaq; virginei fines transgressa pudoris,

A 2

Hor

Hoc exempla probant sacris inscripta libellis:
 Hanc propter causam, referans Deus atria cœli,
 Obruit effusis populos & perdidit vndis.
 Hanc propter causam, splendentia tecta Gomorrhę,
 Et celsas Sodomę turres, sub Tartara misit.
 Tristes dum pluuias incensi Sulphuris alto
 Deiecit cœlo, & Paradisi regna caduci
 Qui coluere, viros crudeli morte peremit.
 Hoc quoq; testantur gentilibus edita scriptis:
 Cur Priami sedes? cur celsę moenia Troiæ
 Mœsta iacent, magnis quondam disiecta Pelasgis?
 Nonne caput belli, & tantorum caussa malorum
 Fœmina rapta fuit? Phrygiæ quæ venit in oras,
 Perfidia Paridis regnis abducta paternis.
 Ex quibus apparet, Regem cui paret Olympus,
 Valde odisse viros, Veneris qui castra pudendæ,
 Et vetiti thalami turpissima furta sequuntur.
 Hæc tu mente pia voluens dilecte Camæniss,
 Inclita Nestorei cedit cui gratia mellis,
 Cui virtute decus partum est, insigneq; nomen
 Duplicis attribuit vigil experientia Iuris,
 Vindicis irati cupienseuadere pœnas,
 Morigeraris ei, thalamiq; decentis honorem
 Fraudibus obscenis præfers, igniq; scelesto.
 Et tibi te dignam sociali fœdere Nympham
 Iungis, vt innumeros tecum feliciter annos.
 Exigat, ac dulci faciat te prole beatum.
 Ergo tibi merito tali gratatur honore
 Aonidum Chorus, & Doctorum turba viroꝝ?
 Quod

Quod nactus Sponsam, venientes ordine Nymphas
 Quæ pietate animi superat, morumq; lepore;
 Non secus ac roseis in bigis quando recurrit
 Lutea Tithoni coniunx, & lampade terras
 Illustrans, alijs aufert sua lumina stellis;
 Sic alias inter lucet tua virgo Puellas;
 Quam domus, & generis bonitas, generosaq; virtus
 Commendat cunctis, celebrem qui nomine Vatem
 AEmilium norunt; raro monstraueris illi.
 Sincera pietate parem; Cœlestia Christi
 Dogmata Stolberga populo tradebat in vrbe,
 Ingenio præstans, & dulci flumine linguæ.
 Cuius ab ore sciens populus, quô vota precesq;
 Verteret, angustis in casibus; vnde salutis
 Posceret arma; Deum patrem, natumq; vocabat,
 Et plenum ardentis Spirabile Numen amoris.
 O nimium felix, ô terq; quaterq; beatus;
 Fausta cui tribuit costam fortuna pudicam;
 Haud dubium est, illam contingere munere Diuum,
 Cui pietas adsit, morumq; probata venustas,
 Illa, velut claro radiat Carbunculus ore
 Inter arenosos lapides, gemmasq; minores;
 Virgineos inter coetus, sociasq; puellas.
 Sic tollit vultus, vera pietate nitentes,
 Omnibus & gemmis, omni præstantior auro est.
 Nam gemmas, aurumq;, domumq;, gregesq; relin-
 Sæpe suis natis, sublati morte parentes; (quint
 At dare non possunt sociam virtutibus auctam;
 A Domino venit hæc, solus qui præsidet orbi;
 A 3 Solus.

Solus & inuidia, quæ vult, facit omnia dextra.
 Ille tibi bene vult, optataq; munera confert
 O Platnere, tuis qui comples laudibus orbem.
 Dum thalamo socias præstanti corpore Nympham
 Gerdruidam, atq; genus vitæ, duce & auspice Christo
 Ingredieris, quo nil habet hic præstantius orbis.
 Heu nimium levis est, qui sacra iugalia temnit,
 Quæ pater ipse hominum, vasti cum prima locaret
 Fundamenta orbis, Paradysi in gramine sanxit.
 Quid prodest, veterum vanos ostendere fastus?
 Quid seriem generis, priscamq; exponere stirpem?
 Quid gemmæ virides? Quid copia magna micantis
 Argentis? Socia vacuus si coniuge lectus,
 Tempora quæ vitæ seros producat in annos,
 Confortisq; ferat dulcissima pignora lecti.
 Namq; dies veluti nitido cum celsus Olympus
 Sole caret, populo tristis plærunq; videtur
 Sic sine prole domus, sic est sine coniuge lectus.
 Huc igitur Phebæa cohors, Satyriq; bicornes,
 Et vos flucticolæ Nymphæ, Dryadesq; puellæ,
 Ferte pedes celeri gressu, cantusq; mouete:
 Dulcisona ex adytis Hymenæum voce sonantes,
 Præbeat vt facilem se, coniugibusq; benignum.
 Quos Deus & Charites fatis iunxere secundis.
 Tu quoq; ter magni decus immortale parentis
 Nate Dei, placida coniunctos pace tueret
 Vt sic successus teneat fortuna perennes:
 Cumææ vatis longissima tempora Sponsa
 Excedat; Sponsus longæui Nestoris annos.

Viuite

4
Viuite felices tot prospera secula vitæ,
Poma quot Hesperidum ramis fert nobilis hortus,
Et quot habent frutices, quot & ardua robora montes
Hercini, & quot sunt fulgenti Sidera cœlo.

Porro etiam vestri memores estote clientis:
Qui dum legitimi celebratis festa cubilis,
Hæc, licet ornatu careant, deductaq; filo
Sint nimium tenui, gratantia Carmina mittit:
Auspiciūq; tibi faustum, Sponsaq; precatur.
Audiat, hisq; meis votis aspiret Iesus.

F I N I S.



urn:nbn:de:urmel-4e52d207-1aba-43d2-b285-ab6f0d14be602-00007122-81